

## 每週經課朗誦經文 ( 巴克禮漢羅/教羅 ) 2011/10/23

### 共同經課-1 申命記三十四章一節~十二節

1 摩西 tùi Mô-ap 平洋上 Nî-pho 山，上 hit-ê kap 耶利哥相對 ê Pí-su-ka 山頭。耶和華 hō 伊看 Ki-liát 全地直到 Tàn； 2 Ná-hut-tha-lī 全地，Í-hoat-連 Má-ná-se ê 地，猶大全地到西海； 3 南方 kap 叫做棗樹城 ê 耶利哥山谷 ê 平洋，到 Só-jī。 4 耶和華對伊講，chit-ê 地就是我對亞伯拉罕、以撒、雅各，chiù-choā 講：我 beh 賞賜你 ê 後裔 ê ta 我 hō 你親目看見；總是你 boē 得 tiòh 過去到 hia。 5 耶和華 ê 奴僕摩西就死 tī-hia，tī Mô-ap ê 地，照耶和華所講 ê。 6 耶和華埋葬伊 tī Mô-ap 地，Pek-pí-jī 相對 ê 山谷；到今 á 日無人知伊 ê 墓。 7 摩西死 ê 時，一百二十歲，目睭無花，精力無衰退。 8 以色列人 tī Mô-ap 平洋為 tiòh 摩西哀哭三十日；為 tiòh 摩西憂悶哀哭 ê 日滿 lah。 9 Lùn ê kiá 約書亞得 tiòh 智慧 ê 神充滿；因為摩西 bat 接手 tī 伊 ê 頂面；以色列人就聽 thàn 伊，照耶和華所命令摩西 ê 來行。 10 後來以色列中無 koh 興起先知親像摩西，伊是耶和華面對面所 bat ê； 11 照耶和華差伊 tī 埃及地，tùi 法老 kap 伊 lóng 總 ê 人臣，以及伊 ê 全地所行 tak 樣 ê 神蹟奇事，也照大權能 ê 手，大 thang 驚 ê 事，就是摩西所行 tī 以色列眾人 ê 目睭前 ê。

### 共同經課-2 詩篇九十篇一節~六節，十三節~十七節

1 上帝 ê 人摩西 ê 祈禱。1) 主 ah，你 tak 世代做阮 khiā 起 ê 所在。 2 Chiah-ê 山 iáu 未生出，地 kap 世界你 iáu 未造成，Tùi 永遠到永遠你是上帝。 3 你 hō 人歸土，講，Lín 世間人，tiòh oát 倒 tng。 4 因為在你看，一千年親像已經過去 ê 昨日；Koh 親像暝間 ê 一更。 5 你親像用大水 kā in 流去；in 親像暝一醒；早起時 in 親像發生 ê 草。 6 早起時發生茂盛；Ê-hng 時受割就枯焦。 13 耶和華 ah，beh 到 tī 時 nih？求你倒 tng；為 tiòh 你 ê 奴僕來回心。 14 求你早起時用你 ê 慈愛 hō 阮滿足；Hō 阮一世人歡喜快樂。 15 求你照你苦楚阮 ê 日，照阮 tú-tiòh 患難 ê 年，hō 阮歡喜。 16 願你 ê 所做對你 ê 奴僕顯現，你 ê 榮光對 in ê kiá 孫顯明。 17 願主阮 ê 上帝 ê 美妙 tiàm tī 阮 ê 頂面；願你堅固阮 ê 手所做 ê 工，阮 ê 手所做 ê 工，願你堅固伊。

### 共同經課-3 帖撒羅尼迦前書二章一節~八節

1 因為，兄弟，lín 家已知阮前到 lín 中間 m̄ 是空空； 2 獨獨 tī 腓立比已經事先受苦 tú-tiòh 凌辱，照 lín 所知 ê，阮 tī choē-choē 爭戰 ê 中間，oá 靠咱 ê 上帝，得 tiòh 好膽 tùi lín 講上帝 ê 福音。 3 因為阮 ê 勸勉 m̄ 是出 tī 差謬，m̄ 是出 tī 無清氣，也 m̄ 是用奸詐， 4 就是阮 hō 上帝驗過，chiah 用福音託重阮，阮就照 án-ni 來講，m̄ 是親像 hō 人歡喜 ê，就是 hō 驗阮 ê 心 ê 上帝歡喜。 5 因為阮 lóng 未 bat 用諂媚 ê 話，照 lín 所知 ê，也無用裝飾來遮蓋貪心，上帝做干證。 6 阮做基督 ê 使徒，雖然 thang kah 人敬重阮，總是 m̄-bat 自人求榮光，也無對 lín，也無對別人。 7 阮就是溫柔 tī lín 中間，親像奶母 io 家已 ê kiá 兒。 8 親像 án-ni，阮因為戀慕 lín，就 m̄-nā 上帝 ê 福音，連家已 ê 性命也歡喜 hō lín；因為 lín 是阮所疼痛 ê。

### 共同經課-4 馬太福音二十二章三十四節~四十六節

34 法利賽人聽見伊已經塞密撒都該人 ê 嘴，就 sa<sup>n</sup>-kap 聚集。 35 其中一人做教法師 ê 試伊，問講， 36 先生 ah，律法中，甚麼誠最大？ 37 伊 kā 伊講，你 tiòh 盡心，盡性，盡意疼主你 ê 上帝。 38 Chit-ê 誠是大 ê，也是頭一個。 39 第二個也 sa<sup>n</sup> 親像，是講，你 tiòh 疼厝邊親像家已。 40 Chit 兩條誠是全律法 kap 先知 ê 總根頭。 41 法利賽人聚集 ê 時耶穌問 in 講， 42 論基督 lín phah 算怎樣？伊是 chī-chūi ê 後裔？In kā 伊講，是大衛 ê。 43 伊 kā in 講，Án-ni，就大衛 hō 聖神感動，怎樣稱伊做主 ah，講， 44 主 kā 我 ê 主講，坐我 ê 大 pêng，thèng 候我將你 chiah-ê 對敵 hē tī 你 ê 腳下？ 45 大衛既然稱伊做主，就基督怎樣做伊 ê 後裔 ah？ 46 無人會應伊一句；tùi hit 日也無人敢 koh 問伊。